

中國方志叢書·華中地方·第九五四號

據

清·陳汝禎等修，匡汝諧等纂
清同治十二年刊本

影印

江西省

廬陵縣志

(土)

成文出版社有限公司印行

中華民國七十八年三月臺一版

廬陵縣志

共十一冊

發行人：黃

成

助

台北郵政信箱二二六〇五號

出版者：成文出版社有限公司

台北郵政信箱二二六〇五號

台北市南京東路三段270號9F

電話：七四一五四三二一九

印刷者：上林彩色印刷有限公司

台北市大理街145號

新聞局出版登記證：局版台業字第一一四三號

廬陵縣志卷五十二

藝文志

文徵募疏

宋

青原山抄題買田

阮

胡銓

倒用魔印追大兵於藕絲孔中直入鯨淵取明珠於驪龍領下須
得恁麼手段乃可遣化十方諄上人乘出世航得摩頂記不但傍
家行腳也能度嶺求田叅透李老飯山會得廬陵米價要養千百
閑漢笑殺涪翁歲取一萬良田謾談周雅可憐開口仰哺有如逢
麴流涎拄杖芒鞋橫担好去怕渠囊漉儘從牛鼻掠天如見泉流
簪取佛頭著地

國朝

重修王仙廟募疏

張貞生

爾聞流峙之靈有鍾於人者有鍾於神者鬼神荒唐之說雖儒者
所弗事然明則爲人幽則爲神其在人者固足以師百世其在神
者亦足以俎豆億萬年則赫聲濯靈洋洋如在安得盡指爲杳冥
不可知之說概擯黜弗道哉吾郡南永和鎮舊名東昌窰市之盛
甲於都會山川所孕毓實產異人若周益國胡澹菴歐監丞文文
山顏沛縣俱相繼崛起其間地靈人傑蘇黃之過其地寄情累日
留連弗去良有自也然此特鍾於人者耳其見於神復有足赫奕
千古者一爲王仙本姓匡諱和唐貞觀中與其叔智修煉王仙智
受天衣上昇和亦尸解和地仙後刺史嚴公因歲旱急遣官致禱
行次磁窰之小湖壇人馬辟易若有呵從不得前者卽其地禱之
立應刺史遂立廟置壇及建炎改元寇四掠賴仙靈見旗幟空中

屢有功於朝於是所司上聞乃賜額輔順初封威遠侯次加肅應
又次加英格是廟之以王仙稱者蓋厯亂彌著厯久彌彰其後一
歐陽氏諱覺淳熙間棄家入廟給埽除營修造如是者周二十年
忽一日不見市謹爲神至元壬午江水入廟越五日始退像立殿
殿間不仆視之則齒髮骸骨猶生腰佩小韋囊疏一軸如故鄉人
因卽其身塑而尸祝之盛爽益顯若姚五之遇颶風而禱袁信之
遇於途曰爲王仙求封或有遇之江外衣敝荷戈行甚武問奚自
曰爲國出戍以及地方疾疫雨暘遐邇祀爲坊神無不有禱立應
異撰楊公於廟之西序築堂爲總管燕安所而其顯應遂與王仙
並稱不朽廟模舊制宏敞金碧輝映或出自勅修或經理於邑宰
或增飾於郡伯歲月雖遙碑刻可考今則風雨所蝕日就圯頽急
有待於興復者先是有僧索予長男世坤書募疏重修未就茲里

中父老及司戶衲子兼逸士陳潔石持啟相告爲更新計嗟乎學者生于百年之後凡上古之鍾於人而爲賢喆者固宜仰止羹牆而其鍾於神正直忠烈無異其鍾於人以並存兩間正氣者爲物不貳又安得不闡揚表彰以存廟祀於弗朽永和鎮僅片地耳鍾於人者後起固當奮發以繼周胡諸先生之芳徽而鍾於神若王仙若歐陽總管俱有益於民生有裨於社稷凡吾生其里沐其澤者又何愛絲粟而不互相樂助鳩工庀材使捍災禦患福澤豐稔之正神不長此寂寞也哉則前此予兒世坤所募而不可必得者或得於予今日之言使予亦可藉手以答神靈之貺則地方之慶亦予之幸矣

募修三江橋疏

李振裕

余丁艱卧章水上有浮屠氏造而請焉其言曰廬陵舊有三江橋

向修於公家大冢宰今圯矣將謀所以復之乞公疏以告四方時
有負土之役弗遑也乃致書郡太守郭公邑令于公曰橋梁道路
亦王政之一端也公其加意於此乎孟冬之十五日溯流及郡則
兩公業爲疏題經始矣余抵里門見有儒衣冠者曰黃嗣貞及某
某余乃揖而進備賓主禮三子皆曰願公一言爲三江橋倡余謝
不敏曰余學聖人之道者也烏能以福田利益之事倡導鄉里哉
三子應聲曰否否此未可以概論也某之所以力請於公者蓋將
爲德於民兼施濟之利勸之貞珉橋之遐邇承先賢之遺澤垂利
賴於無窮此固公之志而某等專以此望於公也余謝曰如子言
誠知道者但余隨先司馬宦遊閱歷南北幾徧獨旋里不數數實
未覩所謂三江橋者請晰言之可乎曰唯唯問其所以得名曰橋
在郡治之北二十里其流出於坤溪與鄆原及所謂山前者合三

江而統漚於茲則先廷尉琴岡公之故里也問其經始之人大小之制曰橋之來也久矣明隆萬時嗣貞之先曰永濟躬募而修之增四墩爲五三洞爲四敘而傳之者則陳蒙山先生也功甚勞而制未備傳二世爲嗣貞之考穎甫氏孺渾以橋故謁冢宰晦菴先生先生慨然以修復爲己任規畫審視較昔綦詳爲撤木而礮石焉首捐金若干自郡邑大夫下及鄉之耆老士氓斂三千金以助經始於己巳迄甲戌凡六年橋乃成蓋明崇禎間事也歐陽醒菴先生爲之記至今頌大家宰之德於不衰問其所以作之利害曰三江合流其勢迅激不可遏而荆楚粵閩四達之衝也當春霖暴漲時輶車驛騎往來踐更士卒將

天子命動關民瘼軍機者至望洋不得渡其廬吉二邑之有事於城者徑道紆迴既遠且勞冒涉危險又常有風濤覆沒之憂此君

子所以動念也曰嗟乎此橋誠不可已夫以數十丈之橋拯百千萬人於不測之地其旁及於荆楚粵閩凡往來吾郡無遠近之人莫不蒙其利焉况昔之撤木而易石也歷歲多而爲功難今因其石而補綴之則力省而效易吾知助財與力與工與米粟者之踵相繼也當事諸君子登高而呼九邑之人與夫荆楚粵閩舉凡東西南北往來絡繹無遠近之人莫不踴躍贊嘆以助其成不旣休與雖然天下事不忠於不成而要期於可久昔之人規畫於此可謂審矣今未三十年復有崩頽之患蓋由溺於因循巽止委斯民之大利任其疾苦號呼側足於尋常尺寸之中率拱手熟視不能畫一策出一議救其弊於傾危未甚之際及隳然大壞乃全舉而委之後起之人嗚呼必有任其咎者矣今者黃生嗣貞承其三世遺澤思爲利於無窮其志可以爲後世法一宜書僧智燄大發願

方思以津梁世人結茅趺坐虎豹見之不敢逼二宜書吉之人士
與凡道所往來者皆追思晦菴冢宰之遺德屬余繼其事三宜書
無三子者之請亦願載筆以從事矣他日橋成當書此爲之記
文徵引

國朝

采芹會引

彭慶鍾

廬邑賓興之設尙已鄉會試有程儀中雋後有賀儀蜚英騰茂之
士莫不爭自濯磨奮興鼓舞以副尊賢育才之至意故歌呦鹿宴
瓊林入西清實繁有徒厥功偉哉而獨於補弟子員竟無有代爲
之慮者何也夫入學先謁學師必執贄以爲禮而士多赤貧將何
以給於是歐君博堂賈於衡聚眾而謀曰盍將厯年所積泉溪營
田明德三所公項共錢萬一千緡盡輸以爲合邑文武采芹之助

咸欣然樂從夫兼及於武其慮周泮水之詩咏多士者曰克廣德
心曰矯矯虎臣蓋文武之材咸萃於學厥重惟鈞斯舉也殆深得
其旨云時余主講石陽事旣成僉囑余爲之引余欣然濡筆而書
之

文徵青詞

宋

禳災青詞

胡銓

上界蒼蒼宅眞靈於杳默衷精炳炳通肝鬲於穹窿當火德之盛
明適南訛之阜育聿稽玉札祇卽星壇無忘疇昔之願言恭設體
辰之醺事非敢祈祐祇以禳災庶昭假於紫清用昌延於赤子

祈雨青詞

胡銓

礎潤蒸雲卷石亦通於造化穴居知雨昆蟲尙感於陰陽人患不

誠矣非難格倘一念之精恪將百靈之鑒知竊以四民重者農八
政一曰食糞盛是出富庶從生顧惟田毛實繫民命適此恢台之
候方資甘澤之秋豈意愆陽浸成蘊暑嗟稻畦之龜坼憂禾隴以
蝗蝻固知造物之機深亦念田家之作苦惟天地實民父母忍令
赤子之啼飢况鬼神司國凶荒肯視炎飈之煽虐是敢撰時圭日
條慮齊心款丹闕而吁帝闈走羣望而祈方社曲盡啼孟之禱庶
獲薄塹之憂大旱望雲尙乏千里之救百穀仰雨願爲三日之霖
值夏眾建靈寶齋青詞

胡 銓

禍重於地避則莫之或知罪獲於天禱焉蓋云無所聿嚴秘宇遐
企高真重念蕞爾下民頑然愚慮或凌弱暴寡而忤忍非義或妬
賢嫉善而殘賊不仁或耽酒色之欲而不知性命之憂或溺博弈
之娛而弗顧父母之養或用水漬米甚於沈猶之飲羊或採卵覆

巢無復中牟之愛雉至於黷貨無厭以謫見於幽明慢神弗虔而
獲戾於上下是以天未悔禍歲仍大災詩方與民莫不穀之憂史
復有人死如麻之嘆爰請遂殿恭欵殊庭瞻璇極於高靈演藥宮
之秘典薦茲明潔杳達紫清冀肝鬲之潛通惟茲馨之默感庶導
迎於善氣以禳却於凝陰伏願俗泰民安祥臻沴殄國益延於鳳
歷世長仰於龍光萬壽無疆永享鴻龐之祐百嘉咸遂潛消螟螣
之災

文徵

宋

太中大夫文昭劉公神道碑

呂端

淳化四年九月壬辰中書左僕射兼學士院大學士文昭劉公伯
雍年五十七終於朝寓御書文昭碩德之碑以賜且詔臣端爲之

文臣敢不敬承明旨謹書其概以揚公之休光用昭後世公名伯
原名順字如璋世家安成蜜湖曾祖用規曾祖妣王氏祖鳳翔
妣周氏父安宇官至節度妣郭氏三代俱贈資善大夫太子少
保妣俱贈夫人公幼時天資端亮好讀書記問絕人太平興國己
卯擢進士第授吉州通判在任八年餘父安宇致仕就養因家吉
州石塘公陞吏科都給事上見奏篇曰他日可掌制又曰初止謂
卿能文不謂剛正如此此眷注之始也應詔條陳十事皆切利病
其一嚴銓試其二勤政事其三務正學其四謹嗜慾其五節民力
其六省刑罰其七均賦稅其八依舊制其九撫四裔其十興絕國
上亟獎歎雍熙四年爲秘書少監國子院編修公言漢社稷臣乃
在周勃汲黯霍光之徒儒者公孫持祿保位宣帝以爲俗儒不達
時宜然使宣帝知求真儒亦何至雜霸哉上曰卿學術精深記問

該博所蘊可大用端拱元年復奏重近侍以儲將相增臺諫以廣耳目監司郡守皆當久任上稱以爲要務進修撰以吏部侍郎兼學士院事上云學士院湫隘公奏宮中不宜增廣陛下欲卑宮室臣等居此亦過矣若遴選名儒而信任之不在棟梁之麗也二年江東亢旱公請出緡錢五十萬民租乃不乏臣非不知縣官急缺然艱食則盜起盜起則調兵費事上曰卿議論殊善使朕聞所未聞兼侍講詔以僕射官公公固辭奏云朝廷守至公之道有司守一定之法行己無私孰不心服淳化元年奏進敬天之戒上曰敬天誠當惟知道者乃可與此公曰皇天親有德享有道此豈聰明作爲所能哉二年授中書檢正兼翰林學士承旨三年十月臣呂端上表以公敢諫正直薦爲左僕射兼學士院大學士公引唐太宗魏徵問對輒上廣諫聽之德四年公奏諫官虛位願早擇正人

以爲國之大器未幾得疾遂卒於京師之寓上深慨之曰某今卒矣誠國家之不幸也國家失重臣哀莫大焉子三人曰邵曰廣曰肅女三人男孫一人曰珏勅葬於江西江濱生米市之原酉辛山卯乙爲之銘曰颯颯之風兮不可追浩浩之志兮今安歸劉棄我死兮吾誰依屋梁夜月兮疑將見之

按順進士府縣志俱載端拱二年己丑而解試則縣志載太平興國四年己卯府志未載查通志進士解試俱無顧名碑云太平興國己卯擢進士第恐因解試及之然其敘雍熙四年暨端拱元年二年已歷貴仕據石塘劉氏家譜載太平興國五年庚辰進士庶幾近之但通志旣未載府縣志又同載端拱己丑卽碑內亦明言太平興國己卯俱無庚辰年號因並識之以備參考

資政殿學士贈通奉大夫胡忠簡公神道碑 周鼎大

武王一戎衣而定天下應天順人之舉也義士猶或非之孔孟實取焉爲萬世計也紹興和議高皇有不得已者矣而宮未歸母后春秋已高故與大臣決策從權中外議論雖洶洶顧無敢極陳於上前者獨樞密院編修胡公銓上書數千言援大義而伸之大畧謂王倫誘至金使欲劉豫我秦檜腹心大臣尊陛下爲石晉孫近傳會遂參政事願竿三人頭羈畱金使與問罪之師時八年十一月也辛亥有旨銓書凶悖刼持其削籍流昭州仍降詔布告中外是日檜近遑恐待罪明日又請收責命不許則乞從末減十二月王倫亦再上章自劾而六曹長貳給舍臺諫自晏景初而下多有救解者乃改監廣州都鹽倉明年正月宰執復奏銓書專詆臣等前和議未諧不敢固請以疑羣心議今已定宜稍甄敘亡酉遂改